

Слава Святей, и Единосущной, и Животворящей, и Нераздельней Троице всегда, ныне и присно и во веки веков. Аминь.

Приидите, поклонимся Цареве нашему Богу.

Приидите, поклонимся и припадем Христу, Цареве нашему Богу.

Приидите, поклонимся и припадем Самому Христу, Цареве и Богу нашему.

Приидите, поклонимся и припадем Ему.

Предначинательный псалом (103-й) (избранные стихи).

**Благослови, душе моя, Господа! Благословен еси Господи!**

**Господи Боже мой, возвеличился еси зело. Благословен еси Господи!**

**Во исповедание и в велелепоту облеклся еси. Благословен еси Господи!**

**Творяй ангелы Своя духи и слуги Своя пламень огненный. Дивна дела Твоя, Господи!**

**На горах станут воды. Посреде гор пройдут воды. Дивна дела Твоя, Господи.**

**Вся премудростию сотворил еси. Слава Ти, Господи, сотворившему вся.**

**Слава Отцу, и Сыну, и Святому Духу, и ныне и присно и во веки веков. Аминь.**

**Аллилуиа, Аллилуиа, Аллилуиа, слава Тебе, Боже (трижды).**

Великая ектения.

Миром Господу помолимся...

Стихословие кафизмы

**Блажен муж, иже не иде на совет нечестивых.**

**Аллилуиа (трижды после каждого стиха).**

**Яко весть Господь путь праведных, и путь нечестивых погибнет.**

**Работайте Господеви со страхом, и радуйтесь Ему с трепетом.**

**Блажени вси надеющийся Нань.**

**Воскресни Господи, спаси мя, Боже мой.**

**Господне есть спасение, и на людех Твоих благословение Твое.**

**Слава, и ныне. Аллилуиа, Аллилуиа, Аллилуиа. Слава Тебе, Боже (трижды).**

Малая ектения

Паки и паки миром Господу помолимся...

Стихиры на Господи воззвах

Глас 8. *Господи, воззвах к Тебе, услыши мя.*

*Господи, воззвах к Тебе, услыши мя. Услыши мя Господи. Господи, воззвах к Тебе, услыши мя: вонми гласу моления моего, вегда воззвати ми к Тебе. Услыши мя Господи.*

*Да исправится молитва моя, яко кадило пред Тобою, воздеяние руку моею, жертва вечерняя. Услыши мя Господи.*

*Воскресны стихиры*

*Стих: Изведи из темницы душу мою, исповедатися имени Твоему.*

**Вечернюю песнь, и словесную службу, Тебе, Христе, приносим, яко благоволил еси помиловати нас Воскресением.**

*Стих: Мене ждуют праведницы, дондеже воздаси мне.*

**Господи, Господи, не отвержи нас от Твоего лица, но благоволи помиловати нас Воскресением.**

*Стих: Из глубины воззвах к Тебе Господи, Господи, услыши глас мой.*

**Радуйся, Сионе Святыи, мати церквей, Божие жилище, Ты бо приял еси первый, оставление грехов, Воскресением.**

*Стих: Да будут уши Твои, внимлюще гласу моления моего.*

**Еже от Бога Отца Слово, прежде век Рождшееся, в последняя же времена, Тоежде от Неискусобрачныя воплощенное волею, распятие смертное претерпе: и древле умерщвленнаго человека спасе Своим Воскресением.**

*Стих: Аще беззакония назириши Господи, Господи, кто постоит Яко у Тебе очищение есть.*

**Еже из мертвых Твое Воскресение славословим Христе, имже свободил еси Адамский род от адова мучительства: и даровал еси миру яко Бог жизнь вечную и велию милость.**

*Стих: Имене ради Твоего потерпех Тя Господи, потерпе душа моя в слово Твое, упова душа моя на Господа.*

**Слава Тебе, Христе Спасе, Сыне Божий Единородный, пригвоздивыйся на Кресте, и воскресый из гроба тридневен.**

*Ины стихиры апостола, глас 4*

*Стих: От стражи утренния до нощи, от стражи утренния, да уповает Израиль на Господа.*

**Прелесть связал еси, по Господе вяжемь, и в темнице, апостоле, заключаемь. Темже тя любовью почитаем, и верою вериги обლობызаем твоя: от нихже почерпающе здравие телесе, и души спасение, по долгу восхваляем тя, боговидче, Безплотных собеседниче.**

*Стих: Яко у Господа милость, и многое у Него избавление, и Той избавит Израиля от всех беззаконий его.*

**Прелесть связал еси, по Господе вяжемь, и в темнице, апостоле, заключаемь. Темже тя любовью почитаем, и верою вериги обლობызаем твоя: от нихже почерпающе здравие телесе, и души спасение, по долгу восхваляем тя, боговидче, Безплотных собеседниче.**

*Стих: Хвалите Господа вси языцы, похвалите Его вси людие.*

**Тобою разум приемлют неразумием одержимии, языков многосеменнии роди первее, ихже образ показа с высоты носимь, сосуд внутрь вмещающь всякое животное, апостоле. Темже всяк тя возраст славит покланяясь, яже носил еси, веригам, за Христа усерднейше.**

*Стих: Яко утвердися милость Его на нас, и истина Господня пребывает во век.*

**Егоже отверглся еси судима, воставша воспел еси из мертвых, апостоле: и проповедал еси в концах мира, Бога же и Человека, благодтию мною земным приобщившася. Темже любовью тя блажим, Петре, покланяющеся, яже носил еси, веригам, за Христа, преславне.**

*Слава, апостола, глас 6*

**Днесь нам основание Церкви, Петр, камень веры, предлагает честныя своя вериги в душевное благочестие. Приидите, вси, сия обლობызающе, благохвальными песньми того увенчаим: радуйся, теплый веры поборниче, иже теплым разумом Христа исповедав, и Сына Божия в дерзновении мнозем: радуйся, вселенная радование, и Небеснаго Царствия ключарю, благодать подавай любовью тя чтущим, и честныя твоя вериги обლობызающим желанием: яко предстоя престолу всех Царя Христа, молитву твоя о нас, совершающих память твою.**

*И ныне, Догматик, глас 8*

**Царь Небесный за человеколюбие на земли явися, и с человеки поживе: от Девы бо Чистыя плоть приемый, и из Нея прошедый с восприятием. Един есть Сын, сугуб естеством, но не Ипостасию. Темже совершенна Того Бога и совершенна Человека воистину проповедающе, исповедуем Христа Бога нашего: Егоже моли, Мати Безвестная, помиловатися душам нашим.**

*Вечерний вход*

*Премудрость. Прости.*

**Свете тихий святых славы, Безсмертнаго, Отца Небеснаго, Святаго Блаженнаго, Иисусе Христе! Пришедше на запад солнца, видевше свет вечерний, поем Отца, Сына и Святаго Духа, Бога. Достоин еси во вся времена пет быти гласы преподобными, Сыне Божий, живот дай, темже мир Тя славит!**

Вонмем.... Мир всем

## **И духови твоему.**

Премудрость, вонмем, прокимен гл. 6, *Господь воцарися, в лепоту облечеса.*

*Стих:* Облечеса Господь в силу и препоясая.

*Стих:* Ибо утверди вселенную, яже не подвижится.

*Стих:* Дому Твоему подобае святыня, Господи, в долготу дней.

Чтения паремий

### *Исхода чтение (глава 40):*

Глагола Господь к Моисею, глаголя: в день един месяца перваго поставиши скинию свидения, и вложиши кивот, и покрывеши его завесою. И внесеши трапезу и светильник ея, и положиши кадильницу златую, во еже кадити пред кивотом свидения. И положиши покров завесы над дверми скинии свидения. И возмеш елей помазания и помажеш скинию и вся, яже в ней, и освятиши ю и вся сосуды ея, и будет свята. И освятиши жертвенник, и будет жертвенник святая святых. И сотвори Моисей вся, елика заповеда ему Господь Бог Святыи Израилев. И покры облак скинию свидения, и славы Господни исполнися скиния. И не можаше Моисей внити в скинию свидения, яко осеняше над нею облак: и славы Господни исполнися скиния.

### *Царств третьих чтение (глава 8):*

Бысть, яко соверши Соломон еже создати дом Господень. И собра вся старцы Израилевы в Сион вознести кивот завета Господня из града Давидова, сей есть Сион. И взяша священницы кивот завета Господня, и скинию свидения, и вся сосуды святыя, яже в скинии свидения. И царь, и весь Израиль пред кивотом. И внесоша священницы кивот завета Господня на место его, в давир храма, во святая святых, под крила Херувимов. Яко Херувими бяху распростерты крилами над местом кивота, и покрываху Херувими над кивотом и над святая его свышше. И не бе в кивоте, кроме двух скрижалей завета, яже положи тамо Моисей в Хориве, яже завета Господь. И бысть, яко изыдоша священницы от святаго, и облак исполни дом. И не возмогоша священницы стати служити от лица облака, яко исполнися славы дом Господа Бога Вседержителя.

### *Пророчества Иезекиилева чтение (главы 43 и 44):*

Тако глаголет Господь: будет от дне осмаго и прочее, сотворят иереи на олтари всесождения вашего и яже спасения вашего, и прииму вы, глаголет Адонай Господь. И обрати мя на путь врат святых внешних, зрящих на востоки, и сия бяху затворена. И рече Господь ко мне: врата сия затворена будут и не отверзутся, и никтоже пройдет сквозе их, яко Господь Бог Израилев пройдет ими, и будут затворена. Яко игумен сядет в них снести хлеб, по пути Еламских врат внидет и по пути его изыдет. И введе мя по пути врат святых, сущих к северу, прямо дому, и видех, и се исполнь славы дом Господень.

Сугубая ектения

Рцем вси от всея души, и от всего помышления нашего рцем...

**Сподоби, Господи, в вечер сей без греха сохранится нам. Благословен еси, Господи Боже отец наших, и хвально и прославлено имя Твое во веки, аминь. Буди, Господи, милость Твоя на нас, якоже уповахом на Тя. Благословен еси, Господи, научи мя оправданием Твоим. Благословен еси, Владыко, вразуми мя оправданием Твоим. Благословен еси, Святыи, просвети мя оправданием Твоим, Господи, милость Твоя во век; дел руку Твоею не презри. Тебе подобае хвала. Тебе подобае пение, Тебе слава подобае, Отцу и Сыну и Святому Духу, ныне и присно и во веки веков. Аминь.**

Просительная ектения.

Исполним вечернюю молитву нашу Господеви...

На стиховне стихиры воскресные, глас 8-й:

**Возшел еси на Крест, Иисусе, снизшедый с Небесе, пришел еси на смерть, Животе Безсмертныи, к сущим во тьме Свет истинныи, к падшым всех Воскресение, просвещение, и Спасе наш, слава Тебе**

*Стих:* Господь воцарися, в лепоту облечеса.

**Христа славословим, воскресшаго от мертвых: душу бо и тело прием, страсти отъобуюду отсече, пречистей убо души во ад сошедшей, егоже и плени: во гробе же истления не виде святое тело, Избавителя душ наших.**

*Стих:* Ибо утверди вселенную, яже не подвижется.

**Псалмы и песньми славословим, Христе, от мертвых Твое Воскресение: имже нас свободил еси мучительства адова, и яко Бог даровал еси жизнь вечную, и велию милость.**

*Стих:* Дому Твоему подобае святыня, Господи, в долготу дней.

**О Владыко всех Непостижиме, Творче небесе и земли, крестом пострадавый, мне безстрастие источил еси: погребение же прием, и воскрес во славе, совоскресил еси Адама рукою всесильною. Слава Твоему тридневному востанию, имже даровал еси нам вечную жизнь, и очищение грехов, яко Един Благоутробен.**

*Слава, глас 6.*

Паки нас теплый предстатель совоздвизает к духовней трапезе, Петр, камень веры, честныя своя вериги предложив нам, якоже снесь многоценну, недугов во врачевание, скорбящих во утешение, в пристанище обуреваемых. Приидите, вси, сия облобызающе, того прославльшаго умолим: молитвами его, Христе, спаси души наша.

*И ныне, глас 6.*

Творец и Избавитель мой, Пречистая, Христос Господь из Твоих ложесн прошел, в мя оболкийся, первыя клятвы Адама свободи. Темже Ти, Всечистая, яко Божии Матери же и Деве, воистинну вопием немолчно: радуйся Ангельски, радуйся, Владычице, Предстательство и Покрове, и Спасение душ наших.

Ныне отпускаеши раба Твоего, Владыко, по глаголу Твоему с миром: яко видеста очи мои спасение Твое, еже еси уготовал пред лицом всех людей, свет во откровение языков, и славу людей Твоих Израиля.

*Святыи Боже, Святыи Крепкий, Святыи Безсмертныи, помилуй нас (трижды).*

*Слава Отцу и Сыну и Святому Духу, и ныне и присно и во веки веков. Аминь.*

*Пресвятая Троице, помилуй нас; Господи, очисти грехи наша; Владыко, прости беззакония наша; Святыи, посети и исцели немощи наша, имене Твоего ради. Господи, помилуй (трижды).*

*Слава Отцу и Сыну и Святому Духу, и ныне и присно и во веки веков. Аминь.*

*Отче наш, Иже еси на небесех! Да святится имя Твое, да приидет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, яко же и мы оставляем должником нашим; и не введи нас во искушение, но избави нас от лукаваго.*

Яко Твое есть Царство, и сила, и слава, Отца и Сына и Святаго Духа, ныне и присно и во веки веков. Аминь.

Отпустительный тропарь, глас 4:

**Богородице, Дево, радуйся, Благодатная Марие, Господь с Тобою; благословенна Ты в женах и благословен Плод чрева Твоего, яко Спаса родила еси душ наших (трижды).**

**Буди имя Господне благословенно от ныне и до века (трижды)**

33-й псалом

**Благословлю Господа на всякое время, выну хвала Его во устех моих.**

**О Господе похвалится душа моя: да услышат кротцыи и возвеселятся.**

**Возвеличите Господа со мною, и вознесем имя Его вкупе.**

**Взысках Господа, и услыша мя, и от всех скорбей моих избави мя.**

**Приступите к Нему, и просветитесь, и лица ваша не постыдятся.**

**Сей нищий воззва, и Господь услышай, и от всех скорбей Его спасе и.**

**Ополчится Ангел Господень окрест боящихся Его, и избавит их.**

**Вкусите и видите, яко благ Господь: блажен муж, иже уповает Нань.**

**Бойтесь Господа вси святии Его, яко несть лишения боящимся Его.**

**Богатии обнищаша и взалкаша: взыскающии же Господа не лишатся всякаго блага.**

Благословение Господне на вас, Того благодатию и человеколюбием, всегда, ныне и присно и во веки веков. Аминь.

УТРЕНЯ (в составе всенощного бдения)

**Слава в вышних Богу, и на земли мир, в человецех благоволение (трижды).**

**Господи! устне мои отверзеши, и уста моя возвестят хвалу Твою (дважды).**

Шестопсалмие.

Псалом 3-й

Господи, что ся умножиша стужающии ми! мнози встают на мя; ...

Псалом 37-й

Господи! да не яростию Твоею обличиши мене, ниже гневом Твоим накажеш мене:...

Псалом 62-й

Боже, Боже мой! к Тебе утреннюю; возжада Тебе душа моя, ...

Слава Отцу и Сыну и Святому Духу, и ныне, и присно, и во веки веков, аминь.

Аллилуиа, Аллилуиа, Аллилуиа, слава Тебе, Боже (трижды - без поклонов).

Псалом 87-й

Господи, Боже спасения моего! во дни воззвах, и в ночи пред Тобою...

Псалом 102-й

Благослови, душе моя, Господа, и вся внутренняя моя, имя святое Его! Благослови, душе моя, Господа, и не забывай всех воздаяний Его! ...

Псалом 142-й

Господи! услыши молитву мою, внуши моление мое во истине Твоей,...

Слава Отцу и Сыну и Святому Духу, и ныне и присно и во веки веков; аминь. Аллилуиа, Аллилуиа, Аллилуиа, слава Тебе, Боже (трижды).

Великая ектения

Миром Господу помолимся...

Бог Господь

Бог Господь и явися нам, благословен Грядый во имя Господне.

*Стих:* Исповедайтесь Господеви, яко благ, яко в век милость Его.

*Стих:* Обышедше обыдоша мя, и именем Господним противляхся им.

*Стих:* Не умру, но жив буду, и повем дела Господня.

*Стих:* Камень, его же не брегоша зиждущий, сей бысть во главу угла, от Господа бысть сей и есть дивен во очесех наших.

Тропарь воскресный, глас 8

**С высоты снишел еси, Благоутробне, погребение приял еси тридневное, да нас свободиши страстей, Животе и Воскресение наше, Господи, слава Тебе! (дважды).**

Слава , апостолу, глас 4

**Рима не оставль, к нам пришел еси, честными веригами, яже носил еси, апостолов первопрестольне, имже верою покланяющесе молимся: твоими к Богу молитвами даруй нам велию милость.**

И ныне, Богородичен, глас 4

**Еже от века утаеное и Ангелом несведомое таинство, Тобою, Богородице, сущим на земли явися Бог, в неслитном соединении воплощаемь, и Крест волею нас ради восприим, имже воскресив первозданнаго, спасе от смерти души наша.**

*Чтение кафизм*

**Господи помилуй Зр., Слава,**

**И ныне... читает кафизму в 3 Славы**

Малая ектения,

Паки и паки миром Господу помолимся...

По 1-м стихословии, седальны воскресны, глас 8

**Воскресл еси из мертвых, Животе всех, и ангел светел женам вопияше: престаните от слез, апостолом благовестите, возопийте поюща: яко воскресе Христос Господь, благоволивый спасти, яко Бог, род человеческий.**

*Стих: Воскресни Господи Боже мой, да вознесетя рука Твоя, не забуди убогих Твоих до конца.*

**Воскресый из гроба яко воистинну, преподобным повелел еси женам проповедати востание апостолом, якоже писано есть: и скорый Петр предста гробу, и свет зря во гробе, ужасашеся. Темже и увидев плащаницы, кроме Божественнаго тела в нем лежащая, со страхом возопи: слава Тебе Христе Боже, яко спасаеши вся Спасе наш: Отчее бо еси сияние.**

*Слава, и ныне, Богородичен:*

**Небесную дверь, и кивот, всесвятую гору, светозарный облак воспоим, небесную лестницу, словесный рай, Евино избавление, вселенная всея великое сокровище, яко Спасение в Ней соделася миру, и оставление древних согрешений. Сего ради во-**

**пием Ти: моли Сына Твоего и Бога, прегрешений оставление даровати, благочестно покланяющимся пресвятому Рождеству Твоему.**

**Господи помилуй Зр., Слава, И ныне... читает кафизму в 3 Славы**

*Малая ектения,*

**Паки и паки миром Господу помолимся...**

*По 2-м стихословии седальны воскресны, глас 8*

**Человецы, Спасе, гроб Твой запечаташа: Ангел камень от дверей отвали: жены видеша воставша от мертвых, и тыя благовестиша учеником Твоим в Сионе, яко воскресл еси, Животе всех, и разрешишася узы смертныя: Господи слава Тебе.**

*Стих: Исповемся Тебе Господи всем сердцем моим, повем вся чудеса Твоя.*

**Мура погребательная жены принесша, глас ангельский из гроба слышаху: престаните от слез, и вместо печали радость примите, возопийте поюща: яко воскресе Христос Господь, благоволивый спасти, яко Бог, род человеческий.**

*Слава, и ныне, Богородичен:*

**О Тебе радуется, Благодатная, всякая тварь, ангельский собор, и человеческий род, освященный храм, и раю словесный: девственная похвало, из Неяже Бог воплотися, и Младенец бысть, прежде век сый Бог наш: ложесна бо Твоя престол сотвори, и чрево Твое пространнее небес содела. О Тебе радуется, Благодатная, всякая тварь, слава Тебе.**

*Полиелей*

**Хвалите имя Господне, хвалите раби Господа. Аллилуиа (трижды).**

**Благословен Господь от Сиона, живой во Иерусалиме. Аллилуиа (трижды).**

**Исповедайтесь Господеви, яко благ, яко в век милость Его. Аллилуиа (трижды).**

**Исповедайтесь Богу небесному, яко в век милость Его. Аллилуиа (трижды).**

*Воскресные тропари святого Иоанна Дамаскина:*

*Благословен еси, Господи, научи мя оправданием Твоим*

**Ангельский собор удивися, зря Тебе в мертвых вменившася, смертную же, Спасе, крепость разоривша, и с Собою Адама воздвигша, и от ада вся свободша.**

*Благословен еси, Господи, научи мя оправданием Твоим*

**Почто мира с милостивными слезами, о ученицы, растворяете Блистаяйся во гробе Ангел мироносицам вещаше: видите вы гроб и уразумейте: Спас бо воскресе от гроба.**

*Благословен еси, Господи, научи мя оправданием Твоим*

**Зело рано мироносицы течаху ко гробу Твоему рыдающыя, но предста к ним Ангел и рече: рыдания время преста, не плачите, воскресение же апостолом рцйте.**

*Благословен еси, Господи, научи мя оправданием Твоим*

**Мироносицы жены с миры пришедшия ко гробу Твоему, Спасе, рыдаху, Ангел же к ним рече, глаголя: что с мертвыми живаго помышляете Яко Бог бо, воскресе от гроба.**

*Слава Отцу и Сыну и Святому Духу.*

**Поклонимся Отцу и Его Сынови, и Святому Духу, Святей Троице во единем существе, с Серафимы зовуще: Свят, Свят, Свят еси, Господи.**

*И ныне и присно и во веки веков, аминь.*

**Жизнодавца рождши, греха, Дево, Адама избавила еси, радость же Еве в печали место подала еси, падшия же от жизни к сей направи из Тебе воплотивыися Бог и Человек.**

**Аллилуиа, Аллилуиа, Аллилуиа, слава Тебе, Боже (трижды).**

Паки и паки миром Господу помолимся...

Ипакои, глас 8

**Мироносицы Жизнодавца предстояща гробу, Владыку искаху в мертвых, Безсмертнаго, и радость благовещения от Ангела приемша, апостолом возвещаху: яко воскресе Христос Бог, подавай миру велию милость.**

*Степенна, глас 8*

Антифон 1

**От юности моя враг мя искушает, сластями палит мя: аз же надеяся на Тя, Господи, побеждаю сего.**

**Ненавидящии Сиона, да будут убо прежде исторжения яко трава: ссечет бо Христос выя их, усечением мук.**

**Слава: Святым Духом, Еже жити всяческим: Свет от Света, Бог Велик: со Отцем поем Ему, и с Словом.**

*И ныне, тойже.*

Антифон 2:

**Сердце мое страхом Твоим да покрывается смиренномудрствующее: да не вознесшееся отпадет от Тебе, Всещедре.**

**На Господа имевый надежду, не устрашится тогда, егда огнем вся судити имать, и мукою.**

**Слава: Святым Духом, всяк кто божественный видит, и предлаголет, чудодействует вышня, в Трех Единого Бога поя: аще бо и трисияет, единоначальствует Божество.**

*И ныне, тойже.*

Антифон 3:

**Воззвах Тебе, Господи, вонми, приклони ми ухо Твое вопиющу, и очисти, прежде даже не возмешь мене отсюду.**

**В матери своей земли отходяй всяк, паки разрешается, прияти муки, или почести поживших.**

**Слава: Святым Духом богословие, Единица Трисвятая: Отец бо Безначален: от Негоже родися Сын безлетно, и Дух Сопрестолен, Сообразен, от Отца спросиявший.**

*И ныне, тойже.*

Антифон 4

**Се ныне что добро, или что красно; но еже жити братии вкупе: в сем бо Господь обеща живот вечный.**

**О ризе своей, Иже крины сельныя украшай, повелевает, яко не подобает пещися.**

**Слава: Святым Духом, Единовидною виною, вся содержатся мироподательне: Бог бо Сей есть, Отцу же и Сынови Единосущен Господственне.**

*И ныне, тойже.*

Прокимен, глас 8: Воскресни, Господи, помози нам и избави нас имене Твоего ради.

**Стих:** Боже, ушима нашими услышахом, и отцы наши возвестиша нам.

Господу помолимся — **Господи помилуй**— Яко Свят еси Боже наш... **Аминь.**

Всякое дыхание да хвалит Господа.

**Стих:** Хвалите Бога во святых Его:

И о сподобитися нам слышанию Святаго Евангелия Господа Бога молим — **Господи помилуй**

3р

Мир всем - **И духови твоему.**

От (Матфея или Марка или...) Святаго Евангелия чтение **Слава Тебе, Господи, слава Тебе.**

Чтение Евангелия.

**Слава Тебе, Господи, слава Тебе.**

**Воскресение Христово видевше, поклонимся Святому Господу Иисусу, единому безгрешному. Кресту Твоему поклоняемся, Христе, и святое Воскресение Твое поем и славим: Ты бо еси Бог наш, разве Тебе иного не знаем, имя Твое именуем. Приидите вси вернии, поклонимся Святому Христову Воскресению: се бо прииде крестом радость всему миру, всегда благословяще Господа, поем Воскресение Его: распятие бо претерпев, смертью смерть разруши.**

50 псалом (чтец).

*Глас 6*

**Слава Отцу и Сыну и Святому Духу.** Молитвами апостолов, Милостиве, очисти множества согрешений наших.

**И ныне и присно и во веки веков, аминь.** Молитвами Богородицы, Милостиве, очисти множества согрешений наших.

**Помилуй мя, Боже, по велицей милости Твоей и по множеству щедрот Твоих очисти беззаконие мое!**

**Воскрес Иисус от гроба, якоже прорече, даде нам живот вечный и велию милость.**

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя богатыя; молитвами Всепречистыя Владычицы нашея Богородицы и Приснодевы Марии: силою Честнаго и Животворящаго Креста: предстательства честных Небесных Сил безплотных: честнаго славнаго пророка, Предтечи и Крестителя Иоанна, святых славных и всехвальных апостол: иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго: иже во святых отца нашего Николая, архиепископа Мирликийских, чудотворца: святых равноапостольных Мефодия и Кирилла, учителей Словенских: святаго равноапостольнаго великаго князя Владимира: иже во святых отец наших всея России чудотворцев, Михаила, Петра, Алексия, Ионы, Филиппа и Ермогена: святых славных и добропобедных мучеников, преподобных и богоносных отец наших, святых и праведных Богоотец Иоакима и Анны (и святаго, имя рек, егоже есть храм и егоже есть день) и всех святых: молим Тя, многомилостиво Господи, услыши нас, грешных, молящихся Тебе, и помилуй нас.

**Господи, помилуй (12 раз).**

Милостию, и щедротами, и человеколюбием Единороднаго Твоего Сына, с Ним же благословен еси, со Всесвятым и Благим и Животворящим Твоим Духом, ныне и присно и во веки веков. — АМИНЬ.

*Канон воскресный. Глас 8*

*Песнь 1*

**Ирмос:** Колесницегонителя фараона погрузи чудотворяй иногда Моисейский жезл, крестообразно поразив, и разделив море, Израиля же беглеца, пешеходца спасе, песнь Богови воспевающа.

**Всесильну Христову Божеству како не дивимся; от страстей убо всем верным, безстрастие и нетление точашу, от ребра же Святаго источник бессмертия искапающую, и Живот из гроба Присносущный.**

**Яко благолепен женам Ангел ныне явился, светлыя нося образы естественныя невещественныя чистоты, зраком же возвещая свет воскресения, зовый: воскресе Господь.**

**Богородичен:** Преславная возглаголашася о Тебе в родех родов, Бога Слова во чреве вмещая, чиста же пребывши Богородице Марие. Темже Тя вси почитаем, сущее по Бозе заступление наше.

*Ин канон крестовоскресный*

**Взяшася врата болезненная, и ужасошася вратницы адовы, зряще в преисподнейшая Сошедшаго, Иже на высоте всех превыше естества.**

Удивишася чини ангельстии, зряще на престоле посаждено Отчи, отпадшее естество человеческое, затвореное в преисподних земли.

*Ин канон Пресвятей Богородице,*

Пречистая Богородице, воплощенное Присносущное и Пребожественное Слово, паче естества рождши, поем Тя.

Грозд Тя Живоносен, всемирнаго искапающ сладость спасения, Дева, Христе, роди.

*Ин канон апостола*

Торжествует ликующи вся Христова Церковь Духом, благохвалящи тя верою: и твоя, апостоле первопрестольне, облобызающи вериги честныя от любви, яже носил еси связан, связуя мучителя.

Из глубины прелести ловя, Петре, человеки, яко рыбы, привел еси тебе Избраншему от рыбарей, истинно в верховнаго всех учеников: сего ради вериги, яже носил еси, облобызаем.

Основанием веры всех души верных наздал еси: и храмы прелести, Петре, низложив, создал еси Церкви, тя велегласно чтущия всегда, и вериги, яже носил еси.

*Богородичен:* Оружия вся льстиваго врага, Пречистая Дево, совершенно оскудеша, отнележе копием уязвися, в Твою утробу нескверную вселившееся Слово. Егоже сладчайшим ныне уязвится желанием сердцу моему, молю Тя.

*Катавасиа:* Сушу глубородительную землю солнце нашествова иногда, яко стена бо огусте обаполы вода, людем пешемореходящим и Богоугодно поющим: поим Господеви, славно бо прославися.

*Песнь 3*

*Ирмос:* Утверждей в начале Небеса разумом, и землю на водах основавый, на камени мя, Христе, заповедей Твоих утверди, яко несть свят, паче Тебе Едине Человеколюбче.

Осуждена бывша Адама вкушением греха, плоти Твоя спасительною страстию оправдал еси, Христе: Сам бо неповинен смертнаго искуса был еси, Безгрешне.

Воскресения свет возсия сущим во тьме, и сени смертней сидящим, Бог мой Иисус, и Своим Божеством крепкаго связав, сего сосуды расхитил есть.

*Богородичен:* Херувимов и серафимов превышши явилася еси, Богородице: Ты бо Единая прияла еси Невместимаго Бога в Твоем чреве, Нескверная: темже Тя вернии вси песньми, Чистая, ублажаем.

*Ин*

Отвергшагося прежде заповеди, Господи, изриновена мя от Тебе сотворил еси, в негоже вообразився, послушанию же навьк, Себе паки наздал еси распятием.

Премудростию вся проуведевый, Господи, и разумом Твоим водрузивый преисподняя, не не сподобил еси низхождением Твоим, Слове Божий, воскресити, еже по образу Твоему.

*Ин*

Даждь нам помощь Твоими молитвами, Всечистая, прилоги отражающи лютых обстоятельств.

Еве праматери Ты исправление была еси, Начальника жизни миру, Христа Богородице, рождши.

*Ин*

Весь Свету соединяся Чистейшему, Того Божественными причащением, свет явился еси второй, Петре, озаряющий души наша.

Законы Христовы утвердил еси, и пребеззаконующия благозаконию научил еси, яко апостолов верховный, яко догматов основание недвижимо.

Языком священным проповедал еси Бога пострадавшего, и на Кресте распеншагося: сего ради, Петре, почитаем связавшия тя вериги.

*Богородичен:* Стояше даже до Тебе смерть неодолимаго стремления: Ты бо родила еси Источник безсмертия, Богородице Мати Дево.

**Катавасиа:** Утверждение на тя надеющихся, утверди, Господи, церковь, юже стяжал еси честною твоею кровию.

*Малая ектения.*

Паки и паки миром Господу помолимся...

*Кондак апостола, глас 2*

**Верховнаго и перваго апостолов, истины Божественнаго ученика, Петра великаго восхвалим, и того верою целуем вериги, прегрешений разрешение приемлюще.**

*Икос*

**Славнаго и великаго Господня ученика, достойно кий язык человек похвалити возможет Егоже бо благословне Божественное Слово ублажи, кий ум восхвалит Обаче еже кто по силе стяжет, должно есть Богу приносить, сие же и сотворити покушаюся: но о, празднолюбцы! Благочестно первопрестольнаго песньми увенчаим, прегрешений разрешение приемлюще.**

*Ин кондак апостола, глас 2*

**Камень Христос, камня веры прославляет светло, учеников первопрестольника: созывает бо вся праздновати, Петре, чудеси твоея честныя вериги, и подает согрешений прощение.**

*Седален апостола, глас 4*

**Яко верховнаго мудрых апостолов, и яко ключаря Небеснаго Царствия восхваляем верою тя, апостоле, и облобызаем чистою совестью, Петре, яже носил еси, яко злодей, вериги, злодейства разрушая вражия: от нихже избавитися нам помолися.**

*Слава, и Ныне, Богородичен*

**Херувимов и Серафимов превышши, Небесе же и земли пространнейши, и видимыя твари и невидимыя явилася еси преимуци неразумным рассуждением: Егоже бо пространства Небеса не вмещают, во Твоей утробе вместила еси, Чистая: Егоже моли спастися рабом Твоим.**

*Песнь 4*

**Ирмос:** Ты моя крепость Господи, Ты моя и сила, Ты мой Бог, Ты мое радование, не оставль недра Отча, и нашу нищету посетив. Тем с пророком Аввакумом зову Ти: силе Твоей слава, Человеколюбче.

**Ты врага суца мя зело возлюбил еси: Ты истощанием странным сошел еси на землю, Благоутробне Спасе, последняго моего досаждения не отвергся, и пребыв на высоте пречистыя Твоея славы, прежде безчестованнаго прославил еси.**

**Кто зря, Владыко, ныне не ужасается, страстию смерть разрушаему; Крестом бежащее тление, и смертию ад богатства истощаваемый, Божественною силою Тебе распятаго; чудно дело, Человеколюбче!**

**Богородичен:** Ты верным похвала еси, Безневестная, Ты Предстательнице, Ты и прибежище христиан, стена и пристанище: к Сыну бо Твоему мольбы носиши, Всенепорочная, и спасаеши от бед, верою и любовью Богородицу Чистую Тебе знающих.

*Ии*

**На Кресте Тя пригвоздиша законопреступных дети, Христе Боже: имже спасл еси яко Благоутробен, славящия Твоя страдания.**

**Воскрес от гроба, вся совоскресил еси суция во аде мертвыя, и просветил еси яко Благоутробен, славящия Твое воскресение.**

*Ии*

**Клас возрастившая животворный, неоранная Ниво, подающаго миру жизнь, Богородице, спасай поющия Тя.**

**Богородицу Тя, Всечистая, просвещшиися вси проповедуем: Солнце бо правды родила еси, Приснодево.**

*Ии*

**Витийствуя Владыки величия, непокоривых евреев сердца к вере обратил еси Божественней, яко основание веры.**

**Шествия твоя познана быша на водах, преобильною любовию, Ходившаго верху сих, Петре, и стези тебе Божественныя Сказавшаго.**

**Врачевство имуще недугов всеразличных, Божественныя вериги твоя, блаженне: сия обლობызаем верою, тя почитающе.**

**Богородичен: Яко в палату пространную вселься Царь всех, во святую Твою утробу, явися воплощаемь, Всенепорочная Владычице.**

**Катавасиа:** Покрыла есть Небеса добродетель твоя, Христе. из кивота бо прошед, святыни твоя е нетленные Матере, в храме славы твоя явился еси, яко младенец руконосимь и исполнишася вся твоего хваления.

*Песнь 5*

**Ирмос:** Вскую мя отринул еси от лица Твоего, Свете Незаходимый, и покрыла мя есть чуждая тьма, окаяннаго; но обрати мя, и к свету заповедей Твоих пути моя направи, молюся.

**Одеятися претерпел еси в багряницу прежде страсти Твоея, Спасе, поругаемь, первозданнаго покрывая безобразное обнажение: и наг пригвоздился еси на Кресте плотию, совлачая, Христе, ризу умерщвления.**

**От персти смертныя, Ты падшее мое паки наздал еси существо, воскрес: и не-стареющееся, Христе устроил еси, явив паки якоже царский образ, нетления жизнь блистающ.**

**Богородичен: Матернее дерзновение, еже к Сыну Твоему имущи, Всечистая, сроднаго промышления, еже о нас, не презри, молимся: яко Тебе и Едину христиане ко Владыце очищение милостивно предлагаем.**

*Ии*

**Настави нас силою Креста Твоего, Христе: тем бо Тебе припадаем, мир подаждь нам Человеколюбче.**

**Окорми живот наш, яко Преблагий, поющих Твое востание, и мир подаждь нам, Человеколюбче.**

*Ии*

**Утоли нестерпимую бурю страстей моих, Яже Бога рождшая, Окормителя и Господа.**

**Служат рождеству Твоему, Пречистая Богородице, ангельстии чинове, и человекоев собрание.**

*Ии*

**Отцу Собезначальнаго, проповедал еси Сына, откровением, всехвальне, Божественным, и блаженства сподобился еси Блаженнаго из уст.**

**Егда свет узрел еси возсиявший на Фаворе, солнечныя покрывающий лучи, светом сущим от Света озарился еси, Петре, и верныя просветил еси.**

**Мертва тридневнававши проповедал еси Христа, Егоже ради вериги носил еси, Петре: имже поклонитися сподобившася, благочестно тя чтим.**

**Богородичен: Отягощеннаго, Пречистая, бременем многим грехов, облегчи мя ныне носити иго укрепляюща Христова легчайшее.**

**Катавасиа:** Яко виде исаиа образно на престоле превознесена Бога, от ангел славы дориносима, о окаянный, вопияше, аз провидех бо воплощаема Бога, света невечерня и миром владычествующа.

*Песнь 6*

**Ирмос:** Очисти мя, Спасе, многа бо беззакония моя, и из глубины зол возведи, молюся: к Тебе бо возопих, и услыши мя, Боже спасения моего.

**Древом крепко низложи мя началозлобный: Ты же, Христе, вознесся на Кресте, крепчае низложил еси, посрамив сего, падшаго же воскресил еси.**

**Ты ущедрил еси Сиона, возсиявый от гроба, новаго вместо ветхаго совершив, яко Благоутробен, Божественною Твоею кровию: и ныне царствуеши в нем во веки, Христе.**

*Богородичен:* Да избавимся от лютых прегрешений, мольбами Твоими, Богородительнице Чистая, и да улучим, Пречистая, Божественное сияние, из Тебе неизреченно воплощенного Сына Божия.

*Ии*

Длани на Кресте распростерл еси, исцеляяй неудержанно простертую во Едеме руку первозданного: и Твоею волею желчи вкусив, и спасл еси, Христе, яко Силен, славящая Твоя страдания.

Смерти Избавитель вкуси, древняго осуждения, яко да и тления царство разрушит, и во адская сшед, воскресе Христос, и спасе, яко Силен, поющая Его воскресение.

*Ии*

Храм Тя Божий и Ковчег, и чертог одушевленный, и дверь Небесную, Богородице, вернии возвещаем.

Требищ разрушитель, яко Бог, бывшее рождество Твое, Марие Богоневесто, покланяемо есть со Отцем и Духом.

*Ии*

Стремглавное преславно претерпел еси распятие, уготовил еси к Небесней стези ноги твоя: еюже нас ходити, учениче Христов, укрепи.

Вселился еси в Жизнь живущих, и вяжемь ея ради, узы велиара сокрушил еси, связавшаго тя: сего ради чтим твоя вериги.

Моли Владыку, всеблаженне, твари, низпослати очищение, и мир и милость славящим тя, яко Того ученик искреннейший.

*Богородичен:* Умерщвления кожных риз совлечеса праотец: Зиждитель бо, в того облачится от Твоих кровей, воплотився паче слова, Всенепорочная.

*Катавасиа:* Возопи к тебе видев старец очима спасение, еже людем прииде от Бога, Христе, ты Бог мой.

*Малая ектения.*

Паки и паки миром Господу помолимся...

*Кондак воскресный, глас 8.*

Воскрес из гроба, умершья воздвигл еси, и Адама воскресил еси, и Ева ликует во Твоем Воскресении, и мирстии концы торжествуют еже из мертвых востанием Твоим, Многомилостиве.

*Икос:*

Адова царствия пленивый, и мертвья воскресивый, Долготерпеливе, жены мирносицы сретил еси, вместо печали радость принесый: и апостолом Твоим возвестил еси победительная Спасе мой знаменья Живодателю, и тварь просвещаеши, Человеколюбче. Сего ради и мир срадуется, еже из мертвых востанию Твоему, Многомилостиве.

*Песнь 7*

*Ирмос:* Божия снизхождения огонь устыдеса в Вавилоне иногда. Сего ради отроцы в печи радованною ногою, яко во цветнице ликующе пояху: благословен еси, Боже отец наших.

Славное истощание, Божественное богатство Твоея нищеты, Христе, удивляет ангелы, на Кресте зрящая Тя пригвождаема, за еже спасти верою зовущия: благословен еси Боже отец наших.

Божественным Твоим сошествием света исполнил еси преисподняя, и тьма прогнана бысть прежде гонящая. Отнюдуже воскресоша иже от века юзницы, зовущие: благословен Бог отец наших.

*Троицен:* Всем убо Господа, Единаго же единому Единородному Сыну православно Отца, богословяще Тя возвещаем, и Единаго ведяще от Тебе исходяща Духа Праваго, Соестественна и Соприсносушна.

*Ии*

Спасение соделал еси посреде вселенная, пророчески Боже: на древо бо вознесен быв, вся призвал еси верою зовущия: отец наших Боже, благословен еси.

Воскрес от гроба, якоже от сна, Щедре, всех избавил еси от тли, тварь же уверяется апостолы проповедающими востание: отцев Боже, благословен еси.

*Ии*

От Девственных ложесн воплощься, явился еси на Спасение наше. Темже Твою Матерь ведяще Богородицу, православно зовем: отцев Боже, благословен еси.

Жезл проростила еси, Дево, от корене Иессеова, Всеблаженная, Плод цветоносящи спасительный, верою Сыну Твоему зовущим: отцев Боже, благословен еси.

*Ии*

Трижды отверглся еси Христа, темже вопрошением трикратным исцеляет твое согрешение, Петре преславне, и утверждение показывает многих колеблющихся.

Яко узник Христов, сладчайшим желанием узам различным приобщился еси: темже и твоим веригам, разрешающим страсти, Петре, верою покланяемся.

Ночь глубокую лютаго многобожия решиши, вселенную проходя, якоже величайшее солнце, Петре, Христов самовидче, апостолов слава.

Слава Христу был еси, Сего твоими удесы прославил еси, Петре преславне. Темже ты славим, и связавшим ты веригам покланяемся.

*Богородичен:* Сошедый на землю, яко дождь, Дево, Богоразумием всю напои землю, и показа Тя Ангелов всех, Чистая, Честнейшую.

*Катавасиа:* Тебе во огни оросившаго отроки Богословившия, и в Деву нетленну всельшагося, Бога слова поим, благочестно поюще: благословен Бог отец наших.

*Песнь 8*

*Ирмос:* Седмерицею пещь халдейский мучитель Богочестивым неистовно разжже, силою же лучшею спасены сия виде, Творцу и Избавителю вопияше: отроцы, благословите, священницы, воспойте, людие, превозносите во вся веки.

Иисусова Божества Пребожественная сила, в нас боголепно возсияла есть: плотию бо вкуш за всех смерть крестную, разруши адову крепость. Егоже непрестанно дети благословите, священницы воспойте, людие превозносите во вся веки.

Распныйся воста, великовыйный паде, падый и сокрушенный исправися, тля отвержена бысть, и нетление процвете: Жизнью бо мертвенное пожерто бысть. Дети благословите, священницы воспойте, людие превозносите во вся веки.

*Троицен:* : Трисветлое Божество, Едину сияющее зарю от Единого Триипостасного Естества, Родителя Безначальна: Единоестественно же Слово Отцу, и Сцарствующаго Единосущнаго Духа, дети благословите, священницы воспойте, людие превозносите во вся веки.

*Ии*

На древе руце мне простершаго, обнаженному, призывающа мя, Своею благообразною согрести наготовою: благословите вся дела Господня, и превозносите Его во веки.

Из преисподняго ада вознесша мя, падшаго, и высокопрестольною славою Родителя почетшаго: благословите, вся дела Господня, Господа, и превозносите Его во веки.

*Ии*

Сопротивных разжженныя и пламеновидныя на нас угаси стрелы: яко да поем Тя во вся веки.

Преестественне Содетеля и Спаса, Бога Слова родила еси, Дево: темже Тя поем, и превозносим во вся веки.

*Ии*

Земледельствуя сердца, Петре, жестокая, благоплоднейшая сия совершил еси, Делателю твари, ключи тебе Божественныя предавшему, вязати же и решить согрешения.

Блажим тя, Петре, всегда, и твоя целуем вериги, яже яко злодей носил еси, убивая злобы начальника, и связуя узами твоими, апостоле.

Неуклонным твоим камнем, Петре, веры, соблюдая Церкви исполнение, от среды соблазны отжени, Петре, и мирное испроси сей, блаженне, устроение.

Узами и страстию пречистою Связавшаго ад и смерть, светло проповедал еси: сего ради, всеблаженне, вериги твоя целующе, освящаемся.

*Троичен:* Якоже чини горнии, возопиим Трисвятыми гласы, Всевиновнаго Отца ныне славяще, и Сына и Духа, Едино Существо, Едину Силу и Едино Действо.

*Катавасиа:* Нестерпимому огню соединившися, Богочестия предстояще юноши, пламенем же невреждени, Божественную песнь пояху: благословите, вся дела Господня, Господа, и превозносите во вся веки.

Богородицу и Матерь Света в песнях возвеличим!

*Песнь 9*

Величит душа Моя Господа, и возрадовася дух Мой о Бозе, Спасе Моем.

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем! (То же повторяется по окончании каждого следующего стиха.)

Яко призре на смирение рабы Своея, се бо отныне ублажат Мя вси роди.

Яко сотвори Мне величие Сильный и, свято имя Его, и милость Его в роды родов боящимся Его.

Сотвори державу мышцею Своею, расточи гордыя мыслию сердца их.

Низложи сильныя со престол, и вознесе смиренныя; алчущия исполни благ и богатыя отпусти тщи.

Восприят Израиля, отрока Своего, помянути милости, якоже глагола ко отцем нашим, Аврааму и семени его даже до века.

*Ирмос:* Ужасеся о сем Небо, и земли удивишася концы, яко Бог явился человеком плотски, и чрево Твое бысть пространнейшее Небес. Тем Тя, Богородицу, Ангелов и человек чиноначалия величают.

Божественным и Безначальным Естеством прост сый, сложился еси приятием плоти, в Тебе Самом Сию составив, Слове Божий, и пострадав яко человек, пребыл еси кроме страстей, яко Бог. Темже Тя во Двою Существо нераздельно и неслиянно величаем.

Отца по Существо Божественному, якоже естеством быв человек, рекл еси Бога Вышний, рабом снизходя, воскрес от гроба, благодатию Отца земнородным полож, иже по естеству Бога же и Владыку, с Нимже Тя вси величаем.

*Богородичен:* Явилася еси, о Дево Мати Божия, паче естества рождши плотию Бога Слова, Егоже Отец отрыгну от сердца Своего прежде всех век, яко Благ, Егоже ныне и телес превышша разумеем, аще и в тело облечеса.

*Ин*

Божия Тя естеством убо Сына, зачатого во утробе свемы Богоматере, и бывшего нас ради Человека, и зряще Тя на Кресте естеством убо страждуща человеческим, безстрастна же, яко Бога пребывающа, величаем.

Разрушися тьма дряхлая, от ада бо возсия Солнце Правды Христос, земли просвещая вся концы, сияя Божества светом, Небесный Человек, Бог земный: Егоже во двою естеству величаем.

*Ин*

Радости и веселия исполнь есть память Твоя, приступающим исцеления точащи, и благочестно Богородицу Тя возвещающим.

Псалмы Тя воспеваем Благодатная, и немолчно, еже радуйся, приносим: Ты бо источила еси всем радость.

Видети сподобился еси дальная, верно надеемая тебе, Петре, и трудов почести от Бога Человеколюбца, радуясь приемлещи. Егоже, плотию твоею, страсть Божественную изобразил еси.

Яко Божественный ключарь Царствия, сего отверзи входы верно ты чтущим на земли, и честныя твоя целующим вериги, Петре, имиже связан носил еси.

С Сыном сый на Фаворе, гласа Отческаго сего являюща сподобился еси услышати: Божественным бо Духом, Петре, твое сердце очищаемо, преславно озарися.

Нам, любовию ты чтущим и вериги твоя целующим, имиже, Петре, связался еси, очищение, и долгов испроси разрешение, и Царствия Небеснаго наслаждение.

*Богородичен:* Света жилище была еси, темже светом настави мя, Отроковице, омрачена всеми вражиими искушеньми: яко да верою Тя, Всечистая, величаю, Мати Дево.

*Катавасиа:* В законе сени и писаний образ видим, вернии, всяк мужеский пол, ложесна разверзая, свят Богу, тем перворожденное слово, Отца безначальна, Сына первородящая Материю неискусуможно, величаем.

Малая ектения.

Паки и паки миром Господу помолимся...

Свят Господь Бог наш! — Яко свят Господь Бог наш. — Над всеми людьми Бог наш.

Ексапостиларий 11:

По Божественном востании, трижды Петра, любиши ли Мя, вопрошая Господь, Своих овец предлагает пастыреначальника: иже видя, егоже любляше Иисус, во след грядуща, вопрошаше Владыку: сей же что Аще хочу, рече, пребывати сему, дондеже и паки прииду, что к тебе, друже Петре.

Слава, светилен апостола

Веригами связана страстей мя окаяннаго, разреши, блаженне, якоже иногда вериги разреши Ангел Божий, и от темницы извед преславно заключена ты в ней, апостолов верховниче, блаженнейше Петре.

И ныне, Богородичен:

О страшное таинство, о преславное чудо! Смертию смерть всеконечне погублена бысть. Кто убо не воспоет; и кто не поклонится Твоему воскресению, Слове, и чисто рождшей Тя плотию Богородице Еяже молитвами, всех геенны избави.

псалом 150-й

Глас 8. Всякое дыхание да хвалит Господа! — Всякое дыхание да хвалит Господа!

(псалмы 150, 148-й, 149-й):

На хвалитех стихиры воскресны, глас 8:

Хвалите Господа с небес, хвалите Его в вышних. Тебе подобает песнь Богу. Хвалите Его вси ангели Его, хвалите Его вся силы Его. Тебе подобает песнь Богу.

*Стих: Сотворити в них суд написан: слава сия будет всем преподобным Его.*

Господи, аще и судилищу предстал еси от Пилата судимый, но не отступил еси от престола со Отцем сидя: и воскрес из мертвых, мир свободил еси от работы чуждаго, яко Щедр и Человеколюбец.

*Стих: Хвалите Бога во святых Его, хвалите Его во утвержении силы Его.*

Господи, оружие на диавола Крест Твой дал еси нам: трепещет бо и трясется, не терпя взирати на силу Его: яко мертвыя возставляет, и смерть упраздни. Сего ради поклоняемся погребению Твоему и востанию.

*Стих: Хвалите Его на силах Его, хвалите Его по множеству величества Его.*

Господи, аще и яко мертва во гробе иудеи положиша, но яко Царя спяща воины Тя стражаху, и яко живота сокровище, печатию печаташа, но воскресл еси, и подал еси нетление душам нашим.

*Стих: Хвалите Его во гласе трубнем, хвалите Его во псалтири и гуслех.*

**Ангел Твой, Господи, Воскресение проповедавый, стражи убо устраши, женам же возгласи, глаголя: что ищите Живаго с мертвыми; воскресе Бог сый, и вселенней жизнь дарова.**

*Стих: Хвалите Его в тимпане и лице, хвалите Его во струнах и органе.*

**Пострадал еси Крестом, Безстрастный Божеством, погребение приял еси тридневное, да нас свободиши от работы вражия, и обезсмертив оживотвориши нас Христе Боже, воскресением Твоим, Человеколюбче.**

*Стих: Хвалите Его в кимвалех доброгласных, хвалите Его в кимвалех восклицания: всякое дыхание да хвалит Господа.*

**Поклоняюся, и славлю, и воспеваю, Христе Твое из гроба Воскресение, имже свободил еси нас от адовых нерешимых уз: и даровал еси миру, яко Бог, жизнь вечную, и велию милость.**

*Стих: Воскреси Господи Боже мой, да вознесется рука Твоя, не забуди убогих Твоих до конца.*

**Жизноприемнаго Твоего гроба стрегуще законопреступнии, с кустодиею запечаташа тогда: Ты же, яко Безсмертен Бог и Всесилен, воскресл еси тридневен.**

*Стих: Исповемся Тебе Господи всем сердцем моим, повем вся чудеса Твоя.*

**Дошедшу Ти во врата адова, Господи, и сия сокрушившу, пленник сице вопиаше: кто Сей есть, яко не осуждается в преисподних земли, но и яко сень разруши смертное узилище; приях Того яко мертва, и трепещу, яко Бога. Всесильне помилуй нас.**

*Слава, стихира Евангельская 11, глас 8*

**Являя Себе учеником Твоим, Спасе, по воскресении Симону дал еси овец паству, за любве воздаяние, яже о пастве попечения ищя. Темже и глаголал еси: аще любиши Мя, Петре, паси агнцы Моя, паси овцы Моя. Он же абие показуя друголюбное, о друзем ученице вопрошаше. Ихже молитвами, Христе, стадо Твое сохраняй, от волков губящих е.**

*И ныне, глас 2*

**Преблагословенна еси Богородице Дево, воплощшим бо ся из тебе ад пленися, адам воззвася, клятва потребися, ева свободися, смерть умертвися, и мы ожихом. тем воспевающе вопием: благословен Христос Бог благоволивый тако, слава тебе.**

*Слава Тебе, показавшему нам свет!*

*Великое славословие*

**Слава в вышних Богу, и на земли мир, в человецех благоволение. Хвалим Тя, благословим Тя, кланяемтся, славословим Тя, благодарим Тя великия ради славы Твоея.**

**Господи Царю Небесный Боже, Отче Вседержителю, Господи Сыне Единородный, Иисусе Христе, и Святыи Душе. Господи Боже, Агнче Божий, Сыне Отець, вземляй грехи мира, помилуй нас.**

**Вземляй грехи мира, приими молитву нашу. Седяи одесную Отца, помилуй нас. Яко Ты еси Един Свят; Ты еси Един Господь, Иисус Христос, в славу Бога Отца, аминь.**

**На всяк день благословлю Тя и восхвалю имя Твое во веки, и в век века. Сподоби, Господи, в день сей без греха сохранитися нам!**

**Благословен еси, Господи Боже отец наших, и хвально и прославлено имя Твое во веки, аминь.**

**Буди, Господи, милость Твоя на нас, якоже уповахом на Тя.**

**Благословен еси, Господи, научи мя оправданием Твоим (трижды).**

**Господи! прибежище был еси нам в род и род. Аз рех: Господи! помилуй мя, исцели душу мою, яко согреших Тебе.**

**Господи! к Тебе прибегах: научи мя творити волю Твою, яко Ты еси Бог мой, яко у Тебе источник живота, во свете Твоем узрим свет. Пробави милость Твою ведущим Тя!**

**Святыи Боже, Святыи Крепкий, Святыи Безсмертныи, помилуй нас! (трижды).  
Слава Отцу и Сыну и Святому Духу, и ныне и присно и во веки веков, аминь.  
Святыи Безсмертныи, помилуй нас. Святыи Боже, Святыи Крепкий, Святыи Безсмертныи, помилуй нас!**

Тропарь воскресный

**Воскрес из гроба и узы растерзал еси ада, разрушил еси осуждение смерти, Господи, вся от сетей врага избавивый; явивый же Себе апостолом Твоим, послал еси я на проповедь, и теми мир Твой подал еси вселенней, Едине Многомилостиве.**

Сугубая ектения.

Помилуй нас, Боже, по велицей милости Твоей, молим Ти ся, услыши и помилуй!..

Просительная ектения.

Исполним утреннюю молитву нашу Господеви...

Премудрость!

**Благослови!**

Сый благословен, Христос, Бог наш, всегда, ныне и присно и во веки веков.

**Аминь.**

**Утверди, Боже, святую православную веру, православных христиан во век века!**

Пресвятая Богородице, спаси нас!

**Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем!**

Слава Тебе, Христе Боже, Упование наше, слава Тебе!

**Слава Отцу и Сыну и Святому Духу, и ныне и присно и во веки веков, аминь.  
Господи, помилуй, Господи, помилуй, Господи, помилуй. Благослови.**

Воскресый из мертвых, Христос, истинный Бог наш, молитвами Пречистыя Своея Матере, святых славных и всехвальных апостол, (имена святых храма и дня), святых праведных богоотец Иоакима и Анны и всех святых помилует и спасет нас, яко Благ и Человеколюбец.

**Великаго Господина и Отца нашего Кирилла, Святейшаго Патриарха Московскаго и всея Руси и Господина нашего Высокопреосвященнейшего Ювеналия, Митрополита Крутицкого и Коломенского, Богохранимую страну нашу Российскую, настоятеля, братию и прихожан святаго храма сего и вся православныя Христианы, Господи, сохрани их на многая лета.**

На 1 часе поется кондак "Взбранной Воеводе" или празднику.